



Mwinue Yesu Juu kama Mwana wa Mungu katika Mwaka Mpya,

“Hatimaye, ndugu zangu, mambo yo yote yaliyo ya kweli, yo yote yaliyo ya staha, yo yote yaliyo ya haki, yo yote yaliyo safi, yo yote yenye kupendeza, yo yote yenye sifa njema; ukiwapo wema wo wote, ikiwapo sifa nzuri yo yote, yatafakarini hayo”— **Wafilipi 4:8.**

Tayari mwaka mpya umeanza; hata hivyo kabla ya kuukaribisha ujio wake, tunatulia na kujihoji, historia ya mwaka ambao umepita na kuishia milele, imekuwaje na mzigo wake wa rekodi? Onyo la mtume linamshukia kila mmoja wetu, “Jijaribuni wenyewe kwamba mmekuwa katika imani; jithibitisheni wenyewe.” Mungu aepushie mbali kwetu sisi katika saa hii muhimu kukamatwa sana na mambo mengine kiasi cha kutotoa muda kwa tathmini binafsi iliyo makini, iliyo wazi! Hebu mambo yenye matokeo madogo yawekwe nyuma na hebu sasa tulete mbele mambo yale yanayohusu maslahi yetu ya milele...

Hakuna yeyote kati yetu, kwa uwezo wetu wenyewe, awezaye kuwakilisha tabia ya Kristo; lakini kama Bwana Yesu akiishi moyoni, roho iliyo ndani Yake itadhihirishwa kwetu; upungufu wetu wote utajazwa. Ni nani atakayetafuta katika mwaka huu mpya kupata uzoefu mpya wa kweli katika mambo ya Mungu? Hebu yarekebishe makosa yako kadiri iwezekanavyo. Ungamianeni makosa yenu na dhambi zenu ninyi kwa ninyi. Hebu uchungu wote na hasira na kijicho vitupiliwe mbali; hebu subira, uvumilivu, wema na upendo viwe sehemu ya utu wenu kabisa; ndipo yoyote yaliyo safi na yenye kupendeza na yenye taarifa njema yatakomaa katika uzoefu wenu...

Ni matunda gani tuliyozaa katika mwaka ambao sasa umepita? Mguso wetu kwa wengine umekuwaje? Tumemleta nani kwenye zizi la Kristo? Macho ya ulimwengu yanatutazama. Je, sisi ni nyaraka hai za Kristo, zijulikanazo na kusomwa na watu wote? Tunafuata mfano wa Yesu katika kujikana nafsi, katika upole, katika unyenyekevu, katika ustahimilivu, katika kuubeba msalaba na katika kujitoa? Ulimwengu utashawishika kututambua sisi kama watumishi wa Kristo?.....

Je, katika mwaka huu mpya, hatutatafuta kurekebisha makosa ya wakati uliopita? Yafaa kwetu mmoja mmoja kukuza neema ya Kristo, kuwa wapole na wanyenyekevu na moyo, kuwa imara, bila kusita, thabiti katika kweli; kwani ni kwa namna hiyo pekee ndivyo tuwezavyo kuendelea katika utakatifu na kufanywa kufaa kwa ajili ya urithi wa watakatifu katika nuru. Hebu tuanze mwaka huu kwa kukana nafsi kikamilifu; hebu tuombe utambuzi ulio wazi, ili tupate kuelewa madai ya Mwokozi wetu juu yetu, na kwamba daima na kila mahali tupate kuwa mashahidi wa Kristo (The Signs of the Times, Januari 4, 1883).

Mwinueni Yesu, ninyi mnaowafundisha watu. Mumwinue Yeye katika maonyo, katika mahubiri, katika nyimbo na katika maombi. Hebu jitihada zenu zote zielekezwe katika kuelekeza roho, zilizochanganyikiwa, zilizotatizwa na kupotea, kwa “Mwana-Kondoo wa Mungu, aichukuaye dhambi ya ulimwengu.” Wasihi watazame na kuishi (The Review and Herald, Aprili 12, 1892).